

Iwwer die Plonns

Wie de Schorsch unn soi Fraa uns iwwer Pingsde besucht, mir uff de Terrass gesetze unn genuch geschwätzt hadde, iss die Fraa uffgestonne unn hott gesaad: Bleibt sitze, isch will nor die Blumme gieße.

Doo frächt de Schorsch: Warum willsde die donn gieße?

Die Fraa seet: Wenischdens hier die Plonns, dess Wechselrösje, gugg doch emol dere ihr Bladder oo, die brauch Wasser.

Dess Kättche hott de Kobb geschiddeld: Ei Schorsch, was e Frooch, isch due doch aach die Blumme gieße.

Ja, seet doo de Schorsch, dess waaß isch joo. Awwer warum muss merr die Blumme eischendlich gieße? Unn doo duts Blumme gewwe, die misse jeden Daach gegosse werrn, warum isses dess su?

Isch habb gegrinst: Schorsch, mett dene Blumme iss dess wie mett doim Äbbelwoi, denn dusde joo aach jeden Daach trinke, odder?

De Schorsch seet: Dess waaß isch aach, ohne Wasser koo Lewe, ob Mensch, Vieh odder Plonns. Awwer isch waaß halt nitt, was dess Wasser mächt, wenn de dess in dess Blummedibbe enoischidde dust. Leeft dess gleich de Stomm enuff unn in die Bladder odder wie issen dess?

Dess Kättche hott die Fraa unn misch oogeguggd unn gefroochd: Waaß ooner vunn eich, wie dess vor sisch gieht?

Jetzt hawwe die Fraa unn aach isch de Kobb geschiddeld unn isch saach: Merr misst emol noochlese, wie dess alles funktioniert.

Die Fraa druff: Fonge merr mol vunn vorne oo: Du kääfsder e Plonns, host e Blummedibbe unn dust se enoisetze, dust awwer noch Blumme-Erd debei unn Dünger, fest odder flüssisch, drickst dess Gonse fest oo unn donn dusde Wasser druff gewwe unn donn, e paar Daach später, siehde, ob die Plonns dess Umplonns iwwerlebt hott. Awwer de Schorsch hott Recht: Wie dess alles unnerm Stomm, unner de Bladder unn noocher unner de Bliede vor sich gieht, dess waaß merr nitt su genau, isch jedenfalls nitt.

No ja, seet de Schorsch, su e Plonns hott joo Worrzele, aach gons foine Worrzele, unn die dun wahrscheinlich die Nährstoffe vunn dem Dünger uffnumme unn in die Plonns tronspordiern. Unn nitt vergesse solle merr, wie isch deletzde gelesse habb, dass im Blummedibbe su Bakdeerje droi sinn, merr glaabd gar nitt wiffell Millione odder Milliarde, unn die helfe mett, de Dünger ferr die Plonns sozesaache essbar ze mache.

Die Fraa guggt de Schorsch oo unn seet: Schorsch, weilde jetzt gefroochd host, bin isch neugierisch worrn unn loss merr vumm Honnes e bissi was außem Internet ausdrücke.

O ja, seets Kättche, unn wennde ebbes host, dess deet uns aach indressiern, gell Schorsch.

Ei nodierlich, seet de Schorsch.

Unn isch saach: E indressond Gebabbel iss dess heit. Ja, isch gugg im Internet nooch unn werr aach gons bestimmt ebbes finne.

Eiern Honnes